

2 TIMOTI

Poru Gigirum Meuma Duwameba Timoti Menan Tenewa

1 ¹ Poru me God anoanowawa gumbe sira inaiinai agiyawa me Keriso Iesu danave wakenewa gumbe Keriso Iesu apasoro meuma anawa. ² ^a Utunwa Timoti ne baigan neuma ge gungap. Mamunwa God sira Ayapan numawa Keriso Iesu gumbe, ano oraiwa ge ano nuniviwa ge yum gungap wakeigimpe.

Poru Ano Yusiwa Timoti Wanne

³ ^b Ne kum ge aram evedni nun gumbe genan anoeni. Isimuranaiwa ayawa mina, God nau meuma ne nonenwa oraivit gumbe eni. Ne God gumbe gaun veni. ⁴ Ge it geuma anoeni, meoya ne ge yaug gemka degadega kokavit atan anoeni. ⁵ ^c Ne anotumat geuma oraiminawa imug yaug anoeni. Anotumat me namu wagog Rois ge inag Yunis gumbe wakenewa. Ne yaug anoeni anotumat gina desiroma me gare ge gungap. ⁶ ^d Meoya mame ne ge gungap watna. God puyowawa me naninwa gungap baraug gennewa, iyam kokavit gumbe sira ikpe. ⁷ ^e God me guwawa a atanwa den nunne, megara me guwawa yusipama, guwawa baigan ge guwawa nonewa oraiwa nunne.

⁸ Meoya Ayapan numawa oya taibe watanwa sira ne Ayapan oya nog aidnawa oya ubmam den a. Megara ne gunap yunata, sira God yusiwa gumbe gae oraiwa oya danadawai auwa. ⁹ ^f God waita nunne, sira me iyakaisiyapama wag nunan auwane. Meoya nu nau den atu, megara God yumateba ge ano oraiwa me ane. Namu ano oraiwa

^a 1:2 Apa 16:1; 1Ti 1:2 ^b 1:3 Apa 23:1 ^c 1:5 Apa 16:1 ^d 1:6 1Ti 4:14 ^e 1:7 Rom 8:15
^f 1:9 Epe 2:8-9; Tai 3:5

mame Keriso Iesu gumbe nunne, ivi piyu mame wadne. ^{10g}Gare Waita Abnawa numawa Keriso Iesu pawane, sira me taibe ane. Keriso me bo wakukamne, sira gae oraiwa gumbe me toewan munne inaiwai ge evedni wakeigimtanwa. ^{11h}Gae oraiwa mame oya, God ne wagomiya nedne, sira opata waigimtanwa abnawa, apasoro sira toewanewan abnawa ne ana. ¹²Meoya ne edawai mame aueni. Megara ne ubmam den eni. Kuyawa ne yaug anona Ayapan me gumbe anotumat eniwa, sira yusipamit anotumat eniwa, Ayapan me gumbe dividivi undag wannawa yaimoyai oma ane amarape.

¹³Anotumat ge baigan me Keriso Iesu danave wakenewa gumbe, divi ge ne gunap anoanawa yusipamit amara. Me guwaguwawa oraiwa toewaniviwa. ¹⁴ⁱDividivi oraiwa gungap gennewa amara, Guwawa Iyakaisi me nu danunup wakenewa gumbe.

¹⁵Ge yaug anoana iyayapan undag mu at Esia wakeyawa mu yankwenegiya. Yapowo Pigeras ge Erumogenes wakeya. ¹⁶Ayapan me Onesiporas ge biviustainawa ano munigimpe. Me kum dada ano yusiwa nunne, sira ubmam den ane ne murap gumbe tunegiya. ¹⁷Ne at Romu apa uwanawa, me ne yaunektan oya yusipamit diug yaunedne. ¹⁸—Ayapan me gumbe ano wampe me kumiwa apa!—Ge yaimoyai yaug anowawa me at Epesas apa anintom mina ne waita nedne.

2 ¹Meoya ge utunwa, God anoano oraiwa me Keriso Iesu danave wakenewa gumbe yutugwa auwa. ²Yangowo yayuyawa namuwo ne veniwa anoana. Ge anotumat yaigipama igiyawa mu oma ane iyayapan toewan mumpewa gumbo me muna. ^{3j}Keriso Iesu mut abnawa mina ge ne gaibu edawai auta. ⁴Mut abnawa nau aiviwa, me divi da den aivi kum evedni inaiwai meuma gumbe. Me meib aiviwa, mut amaraivi abnawa me tamnawa degadega ape. ^{5k}Sira bira da me kae apewa, me gwangwan gumbe kae atanit di. Me meib den apewa oma den ane keret me kae aune abnawa oya me aupe. ^{6l}Piyu nauwawa aivi abnawa me nau yaigipamit apewa, natawa uwapewa, me namu tampe. ⁷Ne divi veniwa ge yaimoyai ano. Ayapan yusiwa gempe dividivi undag yaug anotan oya.

^{8m}Iesu Keriso me Devid dam meuma yaig onamiyawa gumbe yaine, bo igiyawa gumbo sira yoine. Me oya kum evedni anoigima. Mame me gae neuma oraiwa. ⁹ⁿNe gae oraiwa oya edawai aueni, sira ne aiyan murapeba sein gumbe tunegiya apan kukaeba mina. Megara God gaiyawa mina den ane tupe. ¹⁰Meoya dividivi undag aug nikieni iyayapan wagomiyayawa munan. Me mu waita Keriso Iesu danave wakenewa me eyawa yaibobot gumbe autanwa oya.

^{11o}Gae mame natawa di waivi.

^g 1:10 Ibr 2:14 ^h 1:11 1Ti 2:7 ⁱ 1:14 1Ti 6:20 ^j 2:3 2Ti 1:8 ^k 2:5 2Ti 4:8 ^l 2:6 1Ko 9:7
^m 2:8 Rom 1:3; 1Ko 15:4 ⁿ 2:9 Epe 3:1,13; Pir 1:12-14 ^o 2:11 2Ko 4:11

“Nu me gaibu bo atuwa, wanampa me gaibu waketa.

¹² ^pUnwa niki aigimtawa, ivi me gaibu amaraigimta.

Nu me topai atawa, me nu topai numpe.

¹³ ^qNu anotumat kusi, megara me anotumat meuma kokavit.

Kuiyawa me oma den ane me membo topai ape.”

Nau Eme Igiyawa God Baina Wanewa

¹⁴ ^rDividivi mame oya sira wag diruma anope. God namive ge yusipamit wag diruma, gae me waita onan sira iyayapan anoemewa tam wakukampewa oya diguragut den aigimpe. ¹⁵ ^sGe nau geuma oraiwa gumbe wakeigima, sira nau abnawa me ubmam den ag natawa gaiyawa oya opata taibe waiviwa me gumbe wakeigima. Ge gembovit God gumbe puyo yaimoyai a. ¹⁶ ^tGae me anoano ugaugaeba ayun wara. Kuiyawa iyayapan mu me gumbe inainai oraiwa God namive den ape sira egave ape. ¹⁷ ^uGae muma vemewa me matai kamot iviwa kansa mina wateteyampe. Yapowo Aimenaeus ge Piretas wakeya. ¹⁸ ^vMu gae natawa gumbe a amiya, mu waya sira inainewa wait uwane. Mu iyayapan upeba anotumat muma aug tobiyaya. ¹⁹ ^wMegara God nium meumawa yaigipama wakene, sira gae mamaib tenewa, “Ayapan yang anone iyayapan me meumawa,” sira, “Apan me Ayapan iviwa auwaiviwa me kukaeba yankwem ube aga.”

²⁰ ^xGwe koka danave, gooru ge siruva irutawa wakeya, sira yoma ge piyu irut waramiyawa gaibu wakeya. Upeba me garawa kokavitwa oya, sira upeba me garawa kusikarenwa oya. ²¹ ^yMeoya da bira me membovit waribiyag ube aipewa, me matai irut mina me garawa kokavitwa oya. Me iyakaisiyapama sira kokawa meuma gumbe oraivitwa sira dividivi undag gumbo oraivitwa ape.

²² ^zMeoya ge iyayapan uinantaraki anoanowawa muma yankweg siwavit aga, sira ano oraiwa, anotumat, baigan ge yum gumbe aga, nonewa esinewa gumbe Ayapan auvemewa igiyawa gaibu. ²³ ^{aa}Dividivi kuiya onanwa ge warago diguragut yankweya, kuiyawa ge yang anoana mu diguragut emewa. ²⁴ ^{ab}Ayapan nauwawa aivi abnawa den diguragut aigimpe. Megara ge iyayapan gumbo baigan amunigima, toyau munigima, ugwa nikiaigima. ²⁵ ^{ac}Bainda den veme igiyawa ge nonegwa oraiwa gumbe iyaiyai toewamuna. Anten God ape mu nonowa biroriyape, sira mu natawa yang anope. ²⁶ ^{ad}Meoya anten iyayapan upeba mu Seitan tamnewa mu mumbovit inaimutpe, sira Seitan nama meuma gumbe dauwag a ampe.

^p 2:12 Mat 10:33 ^q 2:13 Rom 3:3-4; Tai 1:2 ^r 2:14 1Ti 6:4; Tai 3:9 ^s 2:15 1Ti 4:6
^t 2:16 1Ti 4:7 ^u 2:17 1Ti 1:20 ^v 2:19 Nam 16:5; Ais 52:11; Jon 10:14; 1Ko 8:3
^w 2:22 1Ti 6:11 ^x 2:23 1Ti 4:7

Anotumat Den Emewa Kum Oieba Apa

3 ¹Ge mame yaug anoa, kum oieba apa danadawai koka kumiwa uwape. ²Me kumive iyayapan mamaib ape. Mu apewa mu mumbo oya anog aigimpe igiyawa, anmaga oya anoigimpe igiyawa, mumbo waiya eme igiyawa, apan apan eme igiyawa, God gumbe gae kukaeba veme igiyawa, inomamowa nouwa den avieme igiyawa, gaun den veme igiyawa sira iyakaisi onan igiyawa, ³sira mu apewa baigan onan igiyawa, den anog yankwepe igiyawa, kui upeba yuwampe igiyawa, mumbovit yai den amarape igiyawa, garato eme igiyawa sira ano oraiwa topai eme igiyawa. ⁴Sira mu apewa, omin baraueme igiyawa, inaiinai gwambe eme igiyawa, membo uwag dega eme igiyawa, sira imuwo piyu mame anoano meumawa anoeme megara God oya kokavit den anoeme igiyawa. ⁵²Mu yawamtawa anotumat oraiwa igiyawa, megara mu anotumat oraiwa igiyawa onan. Ge iyayapan mame topai muna.

⁶Yapowo iyayapan upeba mame wakeya. Mu gwe aig ge dauwa eme, sira mu vesin imudanowa den esinewa imuwa aueme. Vesin mame kukaeba gina ubeube eme, sira nonowa apan oya avieme. ⁷Mu evedni gigurum teeme, megara oma den ane natawa yaug anope. ⁸⁴Sira iyayapan mame mu natawa topai eme, Jannes ge Janbres mu Mosisi topai ayawa mina. Mu nonowa miyot umne sira anotumat den yumnasiya. ⁹Megara mu matai kokavit den ampe. Kuyawa iyayapan matai taibe yaug anopewa mu kuyowa onan iyayapan duwam asime kuyowa mina.

Poru Timoti Toewanne

¹⁰Megara ge ne amanap yaimoyai onagana, ne toewanewan neuma, ne eniwa, ne yumateba neuma, ne anotumat neuma, ne iyai waketanwa neuma, baigan neuma sira unwa nikiyaigimtanwa oya. ¹¹⁶Sira edawai ge danadawai me ne at Antiok ge Aikoniam ge Ristra apa tamnawa oya ge ne amanap yaimoyai onagana. Ne edawai mame gumbe unwa nikiana. Megara dividivi undag gumbe Ayapan me waita nunne. ¹²⁷Iyayapan mu imuwo God namive inaiinai oraiwa gumbe waketan anoemewa, mu undag edawai aupe. ¹³Megara kukaeba eme igiyawa ge ugauga eme igiyawa, mu garagara amaorot aigimpe, sira mu matai dividivi kukaeba koka gumbe uyug aikpe. ¹⁴Megara ge yaug anoana sira yutugwa auwana, me apa di wakeya. Ge yaug anoana bira ge toyau genne. ¹⁵Sira ge yaug anoana ge ud toragap Baiboru basiege. Baiboru oma ane anoano gempe sira Keriso Iesu anotumat awa me waita auwa. ¹⁶⁸Baiboru undag God Guwawa gumbe teya, sira munigimtanwa ge dirum watanwa ge sira yaug

¹ 3:1 1Ti 4:1 ² 3:5 Mat 7:15,21; Tai 1:16 ³ 3:8 Eks 7:11 ⁴ 3:11 Apa 13:14-52; 14:5,8-20
⁵ 3:12 Mat 16:24; Jon 15:20; Apa 14:22 ⁶ 3:16 Rom 15:4

anotanwa ge oraiwa ageyau atanwa oya me oraiwa. ¹⁷Me God abnawa me nau oraiwa oya tamibarip oraitwa atanwa oya.

4 ¹God namive, sira Keriso Iesu me gare vin eme igiyawa ge boriruwawaya igiyawa kepteempewa namive, ne anoeni me uwatanwa ge me toimuwawa, sira ne ge dirukna. ²Gae opata wag dirumigima. Yaimoyai meib a, kum oraiwa gumbge ge kum kukaeba gumbge. Iyaiyai wakeg toewan mun, diruma sira dirum anope sira yusiwa muna. ³^eKuiyawa iyayapan matai toewanewan oraiwa den anope. Sira mu imuwo toewanewan opata me mu anotan anoemewa wape. Meoya anoano muma gumbge toewanewan tam gumbo tepe. ⁴Mu natawa yankweg anoano muma gumbge ainamiya gaiyawa aupe. Meib kumiwa matai uwape. ⁵Megara ge dividivi undag mu yaukapa, sira danadawai geuma me gumbge ugwa nikiyaigima, sira gae oraiwa wateteyamivi abnawa nauwawa aigima, sira yaimoyai nau geuma aigima.

⁶^fNe gare puyo egamiviwa atan eni. Ne at piyu mame kwetanwa kumiwa me wait uwane. ⁷^gNe mut yusipamit ana, sira ne kin ageyau ana onanane, sira anotumat neuma amarana. ⁸^hGare mame anoano oraiwa keret meuma nenan tamibarip anewa baraug wakene. Me kumive Ayapan me keptete abnawa oraiwa me nekpe. Ne nekut onan, iyayapan upeba mu me uwatanwa anoemewa mu gaibu mumpe.

Poru Dividivi Meumawa

⁹Ge yusipamit ag nenan tatevit onaga. ¹⁰ⁱDemas me piyu mame baigan ag ne yankweneg at Tesaronika aine. Sira Kresens me at Garatia aine, Taitosi me at Darumatia aine. ¹¹Ruk mekut gunap wakene. Mak aug nenan onaga. Me nau neuma gumbge oraimina. ¹²Sira ne Titikas barauna Epesas aine. ¹³^jNe Toroas apa wakenawa Karupas gumbge wape neuma yankweg onedna. Ge nenan ongetan awa wape neuma auka onaga. Sira buka tam onaga. Ne imunap buka me sip kwapiwa gumbge ainamiyawa tam onaga.

¹⁴^kArekisanda me aiyan kopa gumbge guwawa ubeube ainamiviwa me danadawai koka nedne. Ayapan garawa wampe nau meuma oya. ¹⁵Ge mina gaibu me gumbge yaukapa, kuiyawa me gae numa yusipamit topayane.

¹⁶Ne gae namuiuren wanawa, bira da ne den waita nedne, iyayapan undag ne yankwe negiya. Ne imunap anoeniwa, God mu matai ibnawa den mumpe me oya. ¹⁷Megara Ayapan ne gunap yokene, sira yusiwa nedne. Kuiyawa Ayapan imive wakenewa, ne gae opata yaimoyai yusipamit wape, sira iyayapan at undag gae anope. Ayapan ne waita

^e 4:3 1Ti 4:1 ^f 4:6 Pir 2:17 ^g 4:7 1Ti 6:12 ^h 4:8 1Ko 9:24-25 ⁱ 4:10-11 Apa 15:37-39; 1Ko 4:14; 2Ko 8:23 ^j 4:13 Apa 20:6 ^k 4:14 Ais 59:18; Rom 2:6

nedne mae raion noiwa apa dauwag onedna. ¹⁸Sira Ayapan waita nekpe dividivi kukaeba undag apa dauwag onetna, sira gwetoimu kwiminuwa danave yaimoyai unikna. Ayapan gumbe eyawa wakepe viripusiwa onan. Amen.

Gaun Meuma Oieba

¹⁹^lPriska ge Akuira gumbo nenan gaun wa. Sira Onesiporas ge biviusitainawa gumbo gaun wa. ²⁰^mErastas at Korint apa wakene, sira Tropimas yuwarane, meoya at Miretas apa yankweg onedna. ²¹Ageyau ag onaga meve taig kumiwa uwape. Yuburas, Pudon, Rinas, Kraudia ge tatangwanenaiwa undag genan gaun veme.

²²Ayapan me guwagwa gaibu wakeigimpe. God ano oraiwa me guniyap wakeigimpe.

^l 4:19 Apa 18:2; 2Ti 1:16-17 ^m 4:20 Apa 19:22; 20:4; Rom 16:23